

L'ASSISSURI A LA MUNNIZZA

Assissuri, tu chi s'ì prudenti,
A li spazzini nun ci fari mali,
Chista è l'epuca di lu fari nenti;
Dimmi cu reggi nta stu vintannali?
Ntall'Italia, du livanti a lu punenti,
Ci voli na rifurma ginirali,
Cu suli colpi di scupa e di munnizza
Stà friscu chi l'Italia nun s'addrizza.

Assissura e Diputati
Tennu rigistru e cuntrulluri
E emettinu li liggi
Tutti a so favuri.
In casu di discordia
Li sannu riparari
A rassu di li sò naticchi
E dunni cari cari.

Stu mè paisi malufinu e beddu,
Dicia la bon'arma di me nannu,
A Vita, Salemi e Campubeddu,
Mentri li genti ianu passiannu,
Sintianu la vuci, du purteddu:
Levati di sutta chi ti mpannu!
E arrivavanu a frusciu, strati strati,
Munnizza e pisciazza accutturati.

Viriti ora si c'è cchiù fituri,
St'abitudini divintaru rari,
Ficiru lu macellu, li fignaturu,
Nun parlanu cchiù di trini d'annittari.
E nta stu Pacecu beddu comu un ciuri,
Stamu sempri anziusi a aspittari,
Li sordi li spenninu a maluri,
Nun si capisci soccu vonnu fari.

Zapparu quasi tutta la custata,
Pi fari la fogna, larga e funnuta,
Di Canteddu a lu ciumi Baiata,
Pi a l'acqua niura darici la sciuta.
Zapparu santu Roccu, l'acchianata,
Ficiru e sficiru a la muta,
Comu na boria di na nivarrata
Sutta li coccia a cu s'aiuta aiuta.

Ristau na cosa morta e mpurvicata,
Ficiru un simplici canali,
Senza l'innestu di la palazzata
Pi rennilu cumpletu e funziunali.
Fù comu n'abortu di na gravidanza
Chi vinìa lu munnu a ralligrari
La famigghia, china di spiranza,
Ma la fidi morsi prima di spuntari.

SCIOPIRU

Sciopiro sempri, sciopiro a catina,
Lu lunniri mastru d'ascia e muratura,
Lu martiri l'opirai di l'officina,
Lu mercuri chiddi addetti a spazzatura,
Lu ioviri nta lu strittu di Missina;
Affaccia na funcia ogni matina.

Stù disordini cu la sciopirata,
È duvutu a lu costu di la vita,
Picchè la cosa nunn'è regulata
Secunnu l'entrata cu l'uscita.
Na vota lu gaddu la matina,
Spuntannu l'alba faccia cuccurucù,
Ora s'è lu addu o la addina
Sta meludìa nun si cumprenni cchiù,
Nni babbìa, ni fa sulu cucù.
Forsi è duvutu a la panzazza china
Ormai cu stu mangimi a cannalata,
Puru l'armali ni fannu la babbiaata.

Babbia lu Liuni, lu Gattu e parintera,
Lu Picciuni, lu Cunigghiu e la sò rera.
Ancora dura sta babbiaatura,
Dissi rirennu lu sceccu a la pantera:
Oggi parlannu un semplici Colombo
Ni cugghiunia na nazioni intera.

COMU LI PECURI

Nn'avemu picca di st'epuca fitenti
Chi nn'ha danniggiatu a tutti quanti,
A la tilivisioni chiddu chi si senti,
Miliardi n'hannu stanziatu tanti e tanti.
Infatti custruttura e dipendenti,
Burgisi, burgisuna e commercianti,
Pi chisti c'è la crisi e cungiuntura
E c'è cu strazza nta la mangiatura.

Ormai a sapemu tutti sta canzuna,
Vecchi, giuvinotti e picciutteddi,
Nta lu giurnali scrivinu palluna
Grossi, mizzalini e nicareddi,
Pi pinziunati c'è tanti di miliuna
Di inchiri e r'inchiri carteddi,
Cu li chiacchiari assicuranu cunzolu
Di li miliardi chi pigghianu lu volu.

E sempri cu chiacchiari n'hannu datu aiutu,
Viautri antichi vi lu ricurdati,
Vi parlu du tempu di lu ricugghiutu
Quannu arristamu nta li trazzeri mpantanati.
Ciccio e Vicenzu si davanu aiutu
Mmezzu lu fangu chi vesti spaiati,
A Ciccio e Vicenzu ci finìu a schifìu,
L'amicu di lu ricugghiutu si nni scìu.

E comu di lu ricugghiutu si nni sciu,
Deci anni ci nfrusciau di bona annata
E nta la mannara comu è veru Diu,
Nun ci la detti mai na cazzulata.
Cicciu e Vicenzu aspittannu cu disiu
Un vacili di seri o di quagghiata,
Macari na sculatura di li utra;
L'amicu pinzau sulu pa sò cutra!

Lu stessu fannu tutti sti picurara
Chi cumannanu nta sta picuraria,
Si munginu sti pecuri lattara,
C'è chiddu chi nta la tina rutulia,
C'è chiddu chi la minna ci assuccara,
Sin'anchi a li strippi ci la sbattulia
E tutti li pecuri a quantu ci nn'è
Si fannu mungiri e nuddu dici mè!

LI MUSCHITTI DI LA CHIANA

L'illustri Signor Sinnacu
Cu tutti l'Assissura,
Dimostranu a lu populu,
La sò granni bravura.

Li pratici suspisiru,
Li grossi e scaramucci,
Stannu accillirannu
La lotta contru i surci.

Sti surci sempri rudinu,
Nte chiazzi e li cunnutti,
Comu li porci ngrassanu,
Su fatti quantu i vutti.

Si gghiemu a lu macellu
Dda n'avemu i fatti,
Ci nn'esti tanti grossi
Chi assicutanu li atti.

L'assissura stanzianu
Li sordi pu vilenu,
Iddi sempri criscinu,
Cce di caricari un trenu.

E mentri i surci ngrassanu
E ballanu cu sfrazzu,
La Giunta o Municipiu,
Si mancia lu palazzu.

Dicìa n'Assessuri
Ammazzamu sti mangiuna,
Dumani damu nguesta
A li muschitti e muscagghiuna.

Sempri chi aumentanu
Dda gghiusu nta la chiana,
Stannu pizzuliannu
Tutta la carni umana.

Pi st'armalazzi tinti,
Avenu lu vilenu,
Viva Diu e L'America,
Nn'avemu un malasenu.

E quannu lu usamu
L'effettu lu fà sicuru,
Lu emu diluennu
Cu l'acqua di Munti Scuru.

Ma dicu sti muschitti
Di mali soccu fannu?
Di la sò luridura
Si vannu alluntanannu.

Li nostri cumannanti
Si fannu la casina?
Sceglinu ncampagna
P'aviri l'aria fina.

Ammazzari na muschitta
Esti granni erruri,
Và circannu ossigginu,
S'arrassa du fituri.

Anchi si ppi casu,
Vinissi d'un porcili,
Dà la dimustranza
D'essiri civili.

Nun ccè echiù riligioni,
Lassati a tutti quanti,
Ammalidduzzi copianu
A li nostri cumannanti.

Ni sucanu lu sangu
Mentri unu riposa?
I nostri cumannanti
Un fannu a stessa cosa!

LI SURCIAZZI DI LA CAPITALI

Un ghiornu un surci di la capitali,
Ci dissi a un surci di campagna:
Amicu a Roma comu si magna,
Veni a viriri, nun si sta mica mali,
C'è abbacchiu, pulpetti, è na cucagna,
Cosci di pollu e puru ali,
Bistecchi, trinchi di maiali
E puru spiticchi di muntagna.

Approva ddu surci campagniuolo,
Mischinu campava a la simana,
Siccu, laciru, parìa un stighgiolu,
Muzzicava un cachì, na milingiana,
Un'accia, un brocculu, un citrolu,
Cipuddi, pampini e simenza,
Ammaleddu ci vinìa stintata,
Campava a la Divina Pruvvidenza.

Ci dissi lu rumanu: fatti curaggiu,
Lassa la fami, pigghia la cità,
Lu scarsu ccà mancia furmaggiu,
Provulu, salami, baccalà
E li surci grossi rudinu cchiù megghiu,
Hannu ddi anguna culussali
Chi stannu rurennu puru l'appiramenti
Di lu palazzu du Viminali.

CU SOFFRIE CU GODI

Li Sinnaci di tutta la Sicilia
Si prisintaru a Roma, a capitali,
Pi dumannari a li Ministri cumpitenti,
Li summi cchiù urgenti e principali.
Cu vulia lu cuntributu pu spitali,
Nautru pi la villa e pi la strata,
Cu riclamava pi lu faru e l'arsinali
E cu pi lu munumentu e la firrata.

Ormai abituatu all'abbunanza,
Un Sinnacu, spertu e troppu notu,
Ci dissi a lu Ministru nsutta vuci:
Onorevuli sempri un sou divotu!
Vinni a Roma pi prigari u Pataternu
Chi mannassi nautra vota u tirrimotu!

LU CUMIZIANTI

Vennu, proponinu, prumettinu
Industri, contributi, la cantina,
A Levanzu, Favignana, a lu Marettimu
Faremu distillamenti di binzina;
Fabbrica siderurgica a Curninu.
Passa u quinquenniu e la ligislatura,
Chi si vitti a Corninu e Favignana?
Si vitti na granni fregatura!

Sia comizianti Comunista,
Sia Monarchicu o Republicanu,
Oppuru di li partiti Socialista,
Libirali, Democraticu Cristianu,
Sia clericali o pagnuttista
Lu publicu l'accogli a tutti nsanu.
Summannu tuttu, lu populu si sposta
Pi sentiri parlari un ciarlatanu.